

四庫全書

集部

欽定四庫全書

集部

江湖後集卷十七

詳校官庶吉士

臣朱理

助教

臣

常循覆勘

謄錄監生

臣

黃鐘

謄錄監生

臣

嵇承羣

欽定四庫全書

江湖後集卷十七

宋 陳起 撰

吳仲方

仲方字季仁雪川人範七世孫仲孚之兄也著
秋潭集今輯自永樂大典散篇者惟詞若干闕
名虛齋樂府

鵲橋仙

富沙七夕為友人賦

翠綃心事紅樓歡宴深夜沉沉無暑竹邊荷外再相逢
又還是浮雲飛去錦牋尚濕珠香未歇空惹閑愁千
縷尋思不似鵲橋人猶自得一年一度

漢宮春

次方時父元夕見寄

投老歸來記踏青隄上三度逢君寒窓冷淡活計明月
空樽紅紅白白又一番春色撩人誰信道閑中天地園
林幾見成塵今夕偶無風雨便滿城簫鼓來往紛紛

鰲山寶燈照夜羅綺千門珠簾盡捲看娉婷水上行雲
應自笑周郎少日風流羽扇綸巾

木蘭花慢

漳州元夕

玉梅吹霽雪覺和氣滿南州更連夕晴光一番小雨朝
靄全收人情不知底事但黃童白叟總追遊駕海千尋
綵岫漲空萬點星毬風流秀色明眸金蓮步度輕柔
任往來燕席香風引舞清管隨謳何曾見癡太守已登

車去也又遲留人似多情皓月十分照我登樓

永遇樂

七夕和劉隨之

雲鴈將秋露螢照夜涼透窻戶星網珠疎月奩金小清
絕無點暑天孫河鼓東西相望隱隱光流華渚粧樓上
青瓜玉果多少駢兒痴女金針暗度蛛絲密結便有
繫人心處經歲離思霎時歡愛愁緒空萬縷人間天上
一般情味枉自錦牋囑付又何似吹笙仙子跨黃鶴去

夜飛鵲

七夕和方時父韻

微雲拂斜月萬籟聲沉涼露暗墜桐陰蛾睂乞得天孫
巧惜惜樓上穿針佳期鵲相報到年時此夕歡淺愁深
人間兒女說風流直到如今河漢幾曾風浪因景物
牽情自是人心長記秋庭往事鈿花剪翠釵股分金道
人無著正蕭然竹枕練衾夢回時天淡星稀閑弄一曲

瑤琴

沁園春

自鄞歸賦

客問吾年吾將老矣今五十三似北海先生過之又過
善財童子參到無參官路太行世情滄海何止嵇康七
不堪歸來也是休官令尹有髮瞿曇千巖秀色如藍
新著箇樓兒恰對南看浮雲自在百般態度長江無際
一碧虛涵荔子江珧蓴羹鱸膾一曲春風酒半酣憑欄
處正空流皓月光滿寒潭

賀新郎

送鄭怡山歸里

載酒陽關去正西湖連天煙草滿堤晴絮采翠擷芳遊
冶處簷和嬌絃艷鼓看柳外畫船無數萬頃琉璃渾鏡
淨陡風波洶洶魚龍舞談笑裏遽如許流觴滿引澆
離緒便東西斜陽立馬綠波前浦自是尊鱸高興動恰
值春山杜宇謾回首軟紅香霧咫尺佳人千里隔望空
江明月橫洲渚清夢斷恨如縷

張輯

輯字宗瑞履信之子馮深目以東仙故又號焉
有欵乃集朱湛盧序其詞云東澤得詩法於姜
堯章世所傳欵乃集皆以為采石月下謫仙復
出不知其又能詞也今輯自永樂大典散篇者
只詞若干首名清江漁譜

憶秦娥

有寄

春寂寂畫欄背倚春風立楚山無數暮天雲碧 琴心
寫遍愁何極斷腸誰與傳消息當年情墨淚痕猶濕

浣溪紗

壽老母

夏果初收喚綠華冰盤巧簇映金瓜荷香飛上玉流霞
明月長留千歲色蟠桃多結幾番花誰知羅帶有丹
砂

霜天曉角

日暮

暮天雲闊懶汎琴三疊恰有梅花相伴窻兒上一枝月
憶別恁時節吟情誰共說歌枕偶成清夢畫角曉更
愁絕

臨江仙

望廬山

迢遞關山身歷遍烟霞勝處曾遊九江江畔繫孤舟匡
廬如畫裏南望插天浮瀑布香爐齊五老層層爽氣

陵秋何須魂夢覓瀛洲雲松終可卜我與謫仙儔

洞仙歌

代壽張辰川

蓮舟玉宇得真人親授圮上家風又還有問因何五馬
踏月雲臺秋色裏却賞煙霞袖手酒邊聽說劍歌舞

昇平方許君為赤松友任濁世紛紜海水揚塵再相見
雪髯依舊且歲歲中秋後逾旬更半月東籬菊花重九

滿江紅

題馬蹄山壁

原注 予讀書晉王伯遼馬蹄山
居雨中欲訪道會稽山空鷗寒

落葉自語大書此句於
碧崖丹壑間以堅歸盟

醉髮吹涼但拂劍狂歌而已倩誰問九霄黃鶴便曾來
未玉女窻深松晝靜研朱重點參同契記前回赤水得
玄珠驪龍睡空擾擾人間世除學道無真是把洪崖
肩拍挹浮丘袂朝駕長風滄島上夜騎明月青天際更
幾時回首舊山川三千歲

東風第一枝

代壽李夫人

雨藥方桃晴梢漸杏東風嬌語弦管愛香簾約餘寒喚
舞袖翻嫩暖紅顏清健舊墨竹扶疎手段且碧牕寫就
黃庭畫楫海山開卷春自好得花不淡花又好得春
不淺曉鶯瑤佩秋生月蘸翠尊波滿長逢花處笑西母
霜娥偷換要日邊爭看貂蟬綵侍更迎宣勸

瑞鶴仙

壽趙右司

柳風雙燕語問有誰留人岸花去艣星辰快平步俯園
靡草色青青如許兒童擁路玉谿邊當年杜母料從今
指點山川總是繡衣行處 回顧東堂深窈楚帖長春
竹尊清午紅雲帝所搖佩玉更容與把蓬萊一笑幾番
清淺綠野為花作譜向花前三疊琴心看蒼鶴舞

綺羅香

壽趙太卿

欲雨涼生初弦月在畫戟香中清歡旋種芙蕖深夏木

蘭芳沼銀漢入天鏡攬秋福星度雪欄爭照又誰寫萬
幅尊波一江佳思到魚鳥 吳兒睂語笑裏要見園扉
綠遍平疇青繞羽扇綸巾瀟灑玉貌長好問千年慶會
風雲政此日靜春花草更弦管非霧非煙鶴聲簾幕曉

沁園春

予頃遊廬山愛之歸結屋馬蹄山中以廬山
書堂為扁包日庵作記見稱廬山道人蓋援
涪翁山谷例黃叔豹謂予居都不應舍近取

遠為更東澤黃魯庵詩帖往來於東澤下加
以詩仙二字近與馮可遷遇於京師又能節
文號予東仙自是詩盟遂以為定號十年之
間習隱事業畧無可記而江湖之號凡四遷
視人間朝除夕繳者真可付一笑對酒而為
之歌曰

東澤先生誰說能詩興到偶然但平生心事落花啼鳥
多年盟好白石清泉家近宮亭眼中廬阜九疊屏開雲

錦邊出門去且掀髯大笑有釣魚船 一絲風裏嬋娟
愛月在滄波上下天更叢書觀遍筆床靜晝蓬窓睡起
茶竈踈烟黃鸝來遲丹砂成未何日風流葛稚川人間
世聽江湖詩友號我東仙

賀新郎

代壽趙饒州

綠蔭涼尊俎映雙旌飛翻新帶日邊恩露千里湖山添
鮮碧玉宇光浮眉嫵料范老應難獨步君亦胸中兵十

萬把甘霖小小春東楚江上早一犁雨 赤城霞起連
天姥有丹經親曾密授八篇奇語道骨仙風騎鯨客合
侍紅雲帝所且畫戟清香時度散入邦人簫鼓裏恰春
留芍藥叢歌舞歌更誦大鵬賦

前調

壽湛盧先生

鵲喜花間曉惜凝香低將簾捲海棠開早前度登樓清
嘯月吹入春風不老後五日花朝方到趁舞羅衣花訊

暖撚吟髭玉勒迎東笑留肯住春郵小
廬峯青裏壺
天好一千春棋聲畫永劒光雲表絳雪驪珠看丹轉金
鼎龍盤虎達且未可飛仙蓬島河洛煙蕪眠狐兔握風
雲辨此升平了却共我拾瑤草

欽定四庫全書

江湖集
卷十七

江湖後集卷十七

欽定四庫全書

江湖後集卷十八

宋 陳起 撰

敖陶孫上

陶孫字器之號體齋長樂人為太學生題詩三元樓弔趙汝愚為韓侂冑所捕亡命江湖侂冑敗始登慶元五年進士第官泉州簽判有臞翁集見遺書本王士禎云臞翁古詩歌行頗有盛時江西風氣其詩評尤為談藝家所推引今葺

自永樂大典中補詩八十六首

熊得自古英之近江舟子譁然此異徵也為之
留皮與膽餘均所獲以侈神貺云作獲熊一首
時庚辰孟冬七日

來黥者誰僉曰熊與涉江亂流實始逆予天畀敢違俯
取以薦維古英神謂予汝眩有男不夢有妃莫當居然
兩目視畫若盲甚者痔下取怒河伯醫者色難請謀諸
藥熊兮主方我有玄囊清汝決皆扞汝濁腸有如不信

剖肝自明寧我一死以與衆生拜神之休率曹披啖爾
愛其蹠我愛其膽

古興

我有古時鏡云煉三精魄雙龍護其紐玄霧紛四塞持
照盤古帝面目湛可識包藏久不事天地稍蒼黑昨中
試拂拭依舊存八極惟有世人心寸膜不可得

昔我走東海遙望殊庭曲獨木盤九龍欲以鐵網漉紛
紛下百怪牙甲爭踏蹴珊瑚泣沈沈悵望不省錄終然

拙用大坐閱年代速寄謝寥陽天龍宮書未讀

前感興一首

烏几學癡坐吾炊何以晨了知詩自好不與甌相聞蒼
蒼本空空嗚呼誰使然既窶知滿篝稍喜斗斛仁而我
亦齊民不貪後世賢腹無一寸溫百憂鎮燒煎歸然一
破竈寒蟲欲無年更欲辨名字蟋蟀螽斯間書生謹守
書放步防疾顛蝦蟇緣青冥孤光恣吞吐於菟無角翼
為天守門戶持此感物化堯舜萬萬古冰蠹不知寒夢

蟲不知苦未知了身口甘煖復幾許高高化人臺下視
多劫灰我欲轟雷車老天怒不開死語無出路六經聖
所裁惟應蒯緱劍日夕同歸來

後感興二首

皇天分四時氣節幾錯還俗兒一驚呼識者淚橫落悠
悠羲皇前日月何磊磈不世更凌歷地上光景薄十年
看花草皺面少膏沃看看六鰲背坐愛白日曝何當寥
陽天朗咏無生樂

朝為感興吟暮作感興吟何者最可憐淚盡枯人心身
後多所化所遇或淺深奈何姝姝人色裏矜冠襟野芳
必在擷濁酒必在斟死題善人表生托君子林置之勿
復言愁陰復愁陰

秋日雜興

涼颼動空谷振我庭樹枝鮮榮忽顰蹙顏色慘不怡節
序一如此明當戒裘衣寒蟲勸機杼敦迫不貸時汝意
固可尚我機坐無絲

晝氣差小祥夜氣益以清林端動華彩初月當我楹澗
光若翻鶴草露如栖螢攬衣一徙倚肝鬲涵空明一室
喋衆籟寂寥無人聲落葉忽墮瓦憂心還獨驚

客從湘中來問我手中松當時一寸根翫霄作鸞龍子
可爇我鼎肪可澤我容松今已如此而况種樹翁寄聲
十八丈法當理歸節

陣雲起西北中原暗黃塵豈無康時筭無路不得陳書
生亦過計夜夜占天文匣劍似識時中宵啞然鳴我亦

發悲歌沾衣涕從橫

昨日尚絺綌今日便衾帶天公不闕白故故出不測鄉
來三丈熱變滅在倏忽蓬根杕然醒涼意滿巾幘團扇
豈辦此羞澁謝陋質不必待秋來理宜長棄擲

袁同史丈令賦所欲作醉皓堂詩以為後日數
椽張本四老有袁謂乃其遠祖云

黃雲護靈芝丈人非獨醉蕭然四鶴髮海鳥眩觴味古
來閉關人學道用其意瀉池未返璧政欠頽然睡仙苗

足風露中有熏心厲支頤得一笑劉郎已為帝乾坤重
盪滌奈何前星墜昂藏君家老招喚作許事當筵就羽
翼顏色變韶穉出山雲怡怡還山雲洩洩追思千載上
把酒足自慰君堂定果耳或者樓閣氣是間堪底用萬
甕盛醴齊阿戎氣如虎神手了一世政宜日無何雪紆
展鵲翅高吟紫芝曲四老恐歎至

再簡林子大

糟丘酒無時釋麴雲濤翻前身阮步兵搜句急追奔詩

清酒更冽自扣玻璃盆緬懷君家翁滿懷蟠虞軒職當
調九鼎小却護北門胸中補袞線豈但民瘼痊胡為坐
海山揖客通寒溫邊庭失細大益我愁思繁今君富丈
采色正語不喧念我死塵壒妙語為返魂班班古壘洗
一笑三家村

淒其歲晚不勝鄉國墳墓之情再得四篇贈宗
之母以示他人也

隣曲竟還往歲除當餽分作我淡生活小龍破密雲天

機亦良勤錯綜合瘁芬松栢青始獨茗華黃已芸

重趼踏九州一源貫九流歲晚天報子茲樓斂其秋正
西蒼龍尾下掉白鷺洲旁人為我嘆污瀆橫吞舟

紅塵暗九衢生白有我室山平拄笏頤月滿橫琴膝三
年蠻府掾不愧紙尾筆夢從南海君供我波羅蜜

昔我宦南海賓友日擊鮮今來童市歸掌肉分烏鵲旅
食何足校苦望雙旌煙願為墓戶家毋為地行僊

送安豐尉丁夢符歸雪川因簡之晦兄弟時寓

崇川報恩寺

原注潘指崑山宰文叔以作邑制酒丁姻家云

世紛何豫人直作走千里寒壓破虎羈霜風殺淮葦能
來得吾願連夜燈花喜矯矯將軍力一日破萬紙填胸
龍豹韜政坐毛錐子區區寄人幕誰訪習鑿齒相見各
挽鬚士窮乃如此吾謀適不用步到狼山趾荒村圍海
氣尖城如卧已幸當小盤旋長袖為君起回首叫周郎
湟水面欲死往者城南杜鈿車湊流水胡然落此地伴
客歌快耳吾徒離濶好見即裂其背中年迫婚宦官事

漫不理關心且詩酒甕面撥寒蟻如聞董召南犬鷄封
石髓感君好兄弟行當訪虛址雍丘且勿念將星落寒
紫送歸無好語涼月挂鯨尾君行定過潘茶鼎面曲几
因之啓三請問酒所以止

別袁席之二首

漏盡有行客袁侯挽不來掉頭縉塵中胡為此徘徊何
處非詩具螺江如潑醅公子亦豈癡索笑西湖梅平生
詩書腹不計簿領材噫嗚梁父吟慷慨新豐杯夢作方

士鳬喚杖聽風雷何知江東路瘦馬衝塵埃君名在吏部作吏始此回獸弱而努強蹙縮生自猜自猜固如此一語須君裁王事有靡盬柴車誰當推行矣勿告勞試身文書堆

昨送鄭廣文持氊就客坐今辭習主簿相與枕書卧名字擅一世此法當寒餓臘庵書滿屋十夏作僧過就使君交我指目等奇貨百年寸筆折萬事一甌破獨念君行路歷歷眼中墮入嚮酒無聲道信山辭浣每憶上程

時店火明箇箇征人語暝靄嘶馬帶枯莖是間萬金藥
貴子身劑和飲酒端不惡為米知何奈手板付丞相此
語尚須佐

次韻陳景齊糾掾題品山齋數石之作

吾山何足誇君語煩專送姿為丘壑媚意重瓊琳貢芥
胸劃玲瓏眯眼豁塵瞽白雲足怡悅明月得簸弄居然
衛霍近頓壓鄒魯關故人真陽守遺補臞庵空數株立
拏螭一笑慰歌鳳緬思昔牛李競勢急韃韞能令山萃

碑所欠腹空洞那知負之走更使逐者衆誰言山上山
竟作夢中夢老衰本無欲標榜聊取衷獨憐伏虎雄必
得飲羽中荆室雖苟完漢儀亦多愆君能載酒來我願
共飯甕

有感一首

典衣沽美酒鑄金買艷歌青燈炯長夜如此粲者何平
生有廉蘭方駕欲更過低顏兒女中鬱若鷹在羅酣望
八極表老淚如懸河諸兒頗嗤黠見謂同一波相如混

滌器謝鯤困擲梭古來賢達人細過非所料竊願天子
聖朝廷半丘軻青春深農桑東盡青齊阿坐令倡樓女
委棄黛黑螺下里羞陽春中宮張原注聲雲和我為太平人
短褐生縈駝醉魂招漫郎或有石可磨

謗議

四方集謗議著面矢如雨前身雷將軍柴立吾甚武卻
還觀我生與世實鉏鋤西通襴衡隣東接嵇康堵以茲
料身後貌未得死所一州納一嘲一邑獻一侮並制十

五州我作大謗府餘外九州者設伏特未舉徐思浮言
端中實無所主怪雪羣犬吠眩日百鳥語何由澤其喙
環海變春醕坐使聲名高一日跨堯禹

貫酒

酒泉我南隣喚客青旗翻渴心若絆馬未騁意已奔平
生無長物取具一瓦盆萬事漫不理得酒雙眉軒相傳
新豐坊北奏司命門衣冠敬再拜一病煩公痊富貴不
敢願施我腰脾溫今晨客舟出落日鳴蟬繁屬車得鵷

夷秉羽可解暄却愛畢吏部神全不驚魂渠能給萬甕
甘老愚公村

龔立道家藏號月石屏

桑田鑒一奪周官寒如灰賜珏先淪奔乃自垂棘胎劫
火到咸陽六國無珍材空餘號山在蚌水相縈迴古潭
月荒涼孤光翳復開六丁所邀留珪魄幻紫瑰閔藏三
十年握獄無張雷君先世閩南家枕鳳唼堆夜光有感
觸渠伊入剗裁向來匪石心不轉誤國魁皦如照萬世

是君以聞來遠孫極風流乞語謫餘哀摩挲紫雲姿百
感集我懷石汝亦不遇無兩歐蘇梅

雪中陳孔章招飲

始秋我如京褚中無所齋蕭條方逆旅敗履手自提入
門一曲几塵暗烏皮低平生實有恃壯氣干虹蜺丈夫
死則已未死牛衣啼以茲悟生理得展庶可齊城中雪
沒靴凍馬不敢嘶病夫亦怕出登樓去其梯故人知我
貧坐有一石壺招要過廬下春風破餘淒老懷不勝酒

秩筵已如泥感君一寒語醉鄉強攀躋還歸叱塗路撐
斤只槁梨我策三十六第一捐町畦佩服今十年默化
浙東西惟有三宿戀弱念牽房閨常時過飯家屋上瞻
烏棲勿輕一壺酒踏凍誰為攜窮途見弟兄感涕沾髀
觸世情尚醺答人事多乖睽終焉媿閔嘿夜卧三晝臍
何時接綢繆門壯炊家雞入舍更主客愧無鹿門妻

謝蓋晞之餉筆仍訓以古壽春石刻金剛經

詩人貴筆精如射得矢同有筆仍工書如矢入彀中先

從鼠乞鬚次論腰到蜂平生竹林交未數阮仲容住逢
蔡邕書三日清我胸還臨晉賢帖明眼搏赤熊規摹到
晚唐戰手驚揚風興來欲捉筆趨若螽在蛩夢想諸葛
誠腰錢走江東霜氣侵短褐十日守兔蹤故人知我鄉
孤峰秃玉融遣到管城子今補麟趾終驕豪始入手康
如控奸雄竊擬專賞罰爵之中書公何以報嘉惠古壽
碑色空字方蘭亭逸墨比頭陀濃君家閱古脚今日聊
會逢更待黑虬蟬滿紙昏花濛

和姜堯章桂花裙字韻

紅紫有偏尚桂花總宜人
蟄雪明孤斟絳雲嬌小顰
可憐愛花人兩屐穿秋雲
懷人小山作寄愁中書君
向來驚嶺詩政坐書檄
嗔月中落桂子習氣知幾
塵潘郎桃李姿頗亦尊所
聞提攜風露前縷夜深紺
裙

附堯章作

空山尋桂樹折香思故人
故人隔秋水一望一回顰
南山北山路載花如行雲
闌干望雙槩攬枝儲待君

西陵蔭歌舞夜夜明月嗔棄捐
顙玉佩香盡作秋塵
楚詞秋更苦寂寥無復聞
來吟綠叢下涼風吹練裙

送袁席之挈家之任

神龍不池拘威鳳非籠馴自我交袁君愁見地上人
一官固兒嬉君視真埃塵去如下羈鷹來即釋嶠雲相從
復幾時孰老西湖春門前烏桕花頗怪烏來頻問知八
九雛翅短青尚新感君攜挈行道路嗟良勤念子春秋
學當重博士茵胡為簿餘千折腰五斗陳祭河先惡池

小大則有倫細意事朱墨凡例實要津贈言吾豈敢輒
獻所食芹惟時風雨交塗潦埋車輪十年上饒路夢中
說悲辛黃泥漫塘坡鳴鼉舞淵淪贈子方竹筇副以白
紵巾筇方嚇鬼蜮巾白來祇神意氣得人命杯酒聊慙
慙上馬莫回頭慎勿愁我貧亦莫作怪事祭竈通比鄰

杼山閣詩

原注杼山以
禹四載立名

攝身上諸峰我無千手目神交庶子泉夢老王官谷平
生林壑趣魚鳥即往復杼山落何許面勢工設伏故人

欽定四庫全書

江湖後集
卷十八

十三

郊居賦雌霓從衆讀大聲嗑黃華令德猗綠竹永言乘
標臾會計踵納麓方尊讀書倚肯效舞經祝幸當草木
近安事筵簞卜顏公况華扁江令有餘馥騫掀鵬搏海
天矯龍起陸於馬峙橫閣渠是伯夷築何年黃金彈雞
狗隨跼跼還持揮蠅扇靜對振鷺瀑前山入手版後水
激帽屋風聲逐孫登星采向荀叔誰能治西曹束帶望
賜沐清客班雜坐動處草皆蓼乾坤磨旋蟻身世蕉覆
鹿異時留峴首羊公難諱獨

次韻蓋宰

大化我蟲臂常時炙牛心居然身桔槔老圃愁漢陰簡
書實畏人吏事頗見侵十里得蠻語十年生越吟寧為
尺一稽何者可枉尋蓋公學齊魯頗似東海任雙鬣留
石潯舉世方盤鉞稍傳閉關術抑按娛五禽竭來道院
中狼山即知音披衣起視夜欲借北斗斟寤言種秫陶
渠肯挾策欽琅然庭柯句欲和南風琴勾牽老維摩善
哉去來今飛潛不同穴著鞭英雋林

贈縉雲陳志仲主簿楚語一篇

若有人兮江之皋
寥珠樹兮紉落毛
既輕舉以遠睎衆
流靡靡兮汨獨與
吾相遭余懼夫人
之仙幻兮指達術
以要之忽改容而
善步兮紛還折之
得宜斥姬滿之荒
淫兮服堯禹之所
趨載神鼎以自隨
兮出夔魍以驚愚
予慮夫參重以賈
陪兮曰此耿耿之
故也閔一世之滔
滔兮謂彼不吾即
而吾亦為此懼也
歲貿貿其婉晚兮
天浩浩其雨霜反
而顧余兮被髮內
狂前九疑之喪道

今後渭漣之無梁微夫子之亢衡兮幾人鬼之披攘望
兔迹之咫尺兮仡馳驚之堅彊車軋軋其相摩肩促促
其相望欲抽心而改錯兮慮夫子之我憊忽風后其降
予兮天老字予以嘉名獨怍怍其不自得兮淚流軾之
縱橫幸哀其中道之離立兮若示之以正通縱世人之
不吾與兮吾將卒以自明

燈前曲

琉璃燈暖燒春紅水晶簾垂望欲空美人縹緲隔花霧

春心咫尺無由通寶釵沾酒市樓中當筵一曲悲絲桐
少年遊蕩足行樂江南日日長春風

借山谷後山詩編於劉宜之司戶因書所見呈
宜之兄弟

拾遺詩視孔子道豫章配孟顏後山自餘衆作等別派
彪廳狸豹虎一斑我修直筆公萬世議論不到甘譎訕
中間杜老饒寒餓陳也絕葷黃尚可天公讐施略相當
一字而貧更憐我去年臞菴太荒涼釜中得魚雷隱牀

了知詩崇力排擯誰言錮疾蟠膏肓劉郎食飽嗜昌歜
又一過目思手攬編詩更著顧癡筆字字可丹藏石礪
知君療病我益病心手相忘還展詠百年長病可得辭
兩翁落唾皆可敬勿云身後無知音此詩百變無邪心
候蟲時鳥足感耳我思正在南風琴誰能首塗追四始
以經夾轂騷駕軌意所不快鞭曹劉此時折汝一寸筆
長安市上逢聯璧人持一箭與我直請君了却三萬軸
再見坐我牀下客

與太常丞丁晦甫

我昔嘗為李公客坐覺金氣肅東南鉤章棘句護帖妥
獨立卻視何巉巉此公行世有步里十不五試驚愚凡
尺書飛出岷峨西每沐問訊相雕鑱向來思賢實微尚
夢濯杜老百花潭瓊英玉藥媚初服風日清美生妍酣
直言李公似杜公前者何愧後何慙今來劃逢丁太常
目所未接心已甘孤標出林咲霜鶻健論轉海驅風颿
張旌萬里足騎壯富公所說惟飢饒國中何自得吾兀

尊足乃為公所貪承郎曹司略清貴龍鸞儀象勞所監
工歌韶護未敢請前有琴瑟紛相參據梧枝策了自解
箭鋒一語渠誰諳世間聲利大葦箔置身各自縈繭蠶
一聞解縛脫軀命往往喑舌徒婀娜千人萬人聲一槩
請聽野老真常談捐身大是守身楸閱世當求出世銜
君今氣色日日上歲晚能同彌勒龕

壽通守趙寺丞

忠簡公騎箕尾星千古萬古明天庭在天高廟足歡喜

敕使孫枝扶炳靈輟身仙班寄閑逸閭闔正繞烟花出
朝元冠劍安未動一笑明朝作人日漢家最重水衡丞
康餼錢多上所能掌藏頒用渠式法置之忽分淮股肱
春風作意回焦土黃池崎險爾如許區區鼠輩何足磔
此心本應僧伽祖甘泉酒作真珠紅和氣已墮胡牀中
奮髯抵掌直細事參佐同此祥冲融大江洸洸去無極
江南老人候舟色諸公歸補父兄處二十五城那得直
海門短簿初來時青衫恰輟惟烟姿興來得句自推激

為公壓倒崧高詩

代劉潛使壽相君

神仙窟宅會四明氣候中和開二月是間表表韋平家
奎閣明良拱天闕前周後魯友相望孕昴降嵩天所設
大慈平等現官身思日贊襄盡臣節平生履狝真益下
餘刃礫牛何慮缺道逢不平忽偉事坐覺日月妖氣豁
未嘗示袒勃安劉亦復和羹商得說由來轉物得三昧
政爾成風聊一咲涵濡少海益重潤運動紫樞高柄揭

邇來邊瑣向平寧西土民艱隨殄滅撞搪噉呼間未免
寸地尺天吾忍免公身固已佩安危公壽應當等溟渤
花明柳暗沙堤外著眼昌昌見春物想當鳳沼引夔龍
內樂宮壺儼成列天皇酌醴賜加勞詞人第頌歌明哲
會令宇宙還帖泰要與鴻濛論融結此時桃李競新枝
草木恩光相煥發小儒囿身塊北內獨駕封軺來百粵
惟當歲獻南山詩長與天朝誇突兀

贈龜山慧海長老

向來縛虎正死急今日看牛無可鞭我提審定之兩印
十年勘盡諸方禪浙東西山好僧相頭目靜如秋水蓮
試令回眼參壁觀掣頓已作獼猴顛平生捧喝不作用
何者可毒臞翁拳龜山爬沙吸淮海上有蜀客蹲其顛
石顧鐵脊鋸牙齒老龜無力供迴旋自言小來坐鬼窟
木客對誦明月篇山中白石足朝飯無語可對蹲鴟前
一行乃得命大謬萬事瓦裂今蕭然祇念竿木事遊戲
鐵胎五百成拘牽至人無心亦到我顧念塵脚相摩湔

是身如雲即虛幻安要包裹爭鮮妍爾來臞弱頗狡獪
隨風轉施忘洄沿都梁采藥竟何有杖頭挑得枯藤僊
高堂暗坐觸蝙蝠放光時有堦頭磚了無一法可酬難
蒲團禪板久已捐山空月明礎石員百圍老幹行參天
何當斷手釋椎鑿與師共泛荆溪船

江湖後集卷十八

欽定四庫全書

集部

江湖後集卷二十九

詳校官庶吉士臣朱理

助教臣常循履勘

謄錄監生臣嵇承羣

謄錄貢生臣吳壽康

欽定四庫全書

江湖後集卷十九

宋 陳起 撰

教陶孫下

中夜嘆

臞庵胸中空濩落正爾有愁無處著比來有酒三捫膺
突兀又似堆衡霍道邊俗子畧滿眼舉扇鄣塵不容卻
正如白日殺快讐草草九衢面皆惡不應叔末盡鬼魅
世道如此我何樂塵頭鼠目動侮人貌敬逡巡背輕薄

其餘邊幅綴周孔汝身無苦何遭縛中原干戈六十載
八陵玉座塵漠漠假君無力堪汎掃渠可忘憂置恢拓
屯田邊壘差易事三十餘年東高閣嗚呼吾君至仁厚
一言罷行水赴壑雷塘勺陂可復請專創一司足經畧
牛犁居屋旋填補虎士編氓間參錯聊城指日下魯竒
祁連刻期開衛幕行之十年倘未効臣頭請膏斬馬鐔
奈何諸人忍奈事天保正用初無作居然判道君北海
不復追隨我西洛墨池到了須楯鼻茶甌小緩支鐫脚

儒生寂寞守太玄共盡同歸一丘壑

張連魯仲本蜀人從其先宦嶺表僅五六十年
矣為言廣州城內有檜奇古甚土人相傳自唐
末至今往時東坡先生道惠宿留此州嘗供佛
其下得甘露綴枝之異予徵二事皆無所據而
耆舊相傳云爾要必有從來者張乞詩為賦長
謠一篇

亳州仙檜翬翬玩西湖老檜陳朝餘區區草木定何意

多生要傍齋房居吾行東廣足已劬兩年纔到安期蒲
菩提葉老還書蠹波羅子重空懸壺地荒了不快人意
照耀南海何能無邇來劃見張公子火雲肉山煉心水
搜奇訪古偶及之破笑勞君相指似門前磬折得堵宮
諸天龍神俱儼容左呵右禁防所奪上帝遺我駟玉龍
問從張公得明證指畫檜身分四印嗟哉此老亦不逢
生世適當唐晚閏天迴地轉逢今茲霸戰王爭了不知
試看左紐足奇怪虎脰骨貫龍鱗皮霜枝雪榦如相偶

老大商山餘四叟年深幾慣雷霆爭夜定一從牛兒走
道形天貌吾何心晚歲聊依清磬音忽然空中聞款縈
指李大人勤遠臨更傳坡仙曾設供甘露綴枝如潑豕
桃源事託五柳翁後世請將吾語用

長歌行

徐州文壤基崇壇老蔡徑尺剗心肝銅槃照夜血光碧
上有慘澹雙鏤干請君載書許君死徹器未竟盟已寒
了知今人不如古古人亦有難知處張生刎頸殲陳餘

酈兒給印屠諸呂勸君結交勿結心報君多是逡巡人
捋飢重脫嗾焚厄出淖曾叨食馬恩輕言託心腹心腹
為禍媒畏途巉空薄側掌要離孤塚空崔嵬我願中堂
置甕常盛酒後列絲竹前賓友細腰燈前拓秋窻有來
白事酌其口交亦不必結名亦不必聞燕南甌鼈藉地
醉千載一笑平原君

次韻翁伯紹教授

南窻解衣學畫史夢繞西湖貌西子了無一語對青山

側釐隄廩相與閒平明視鏡稀可數生愛詩名壓千古
春風別我不作難壺漿瘦驢行出祖政思坐上覓佳客
廣文先生秀眉宇船頭把詩報忙事欲些黃陳作黃土
摩挲老眼說舊觀絳衣大冠逢建武二公派當百似續
行舒綴遠如觀舞百年許長作灰冷手披口吟心獨苦
許君一死力負荷麾斥衆楚昌齊語典衣沽酒人敢易
鼠壤猶堪窖餘窶長生木瓢要賞真元劉放浪猶詩人
眼前生後姑置論紅紫事休天地貧

代送別趙使君

白衫紫領休霑襟聽我一曲截鐙吟使君五馬新鑿蹄
大江橫前氣駸駸問知淮民何所戀年來家有生羆犬
同州雜鞭且未下山陰大錢聊可選門闌書生守遺經
二年作吏勞丁寧即日遂良鬚盡白平生阮籍眼偏青
君行奏書踏龍尾好為人間種桃李魚竿冷宦不足言
有一負公如此水

雁中箭詞

原注平望澤中觀弋雁者愴然有感已酉十月初四日

南來羈鴻北方客背負嚴霜飛不得日中命盡射生手
一箭正中凌空翮一鴻中機百鴻驚點空細字紛斜橫
力窮遭烹忍一死可憐片影長孤征古人畢弋豈無意
登俎亦可無肉味至今暴殄及胎夭殺氣為妖滿天地
物生何至相吞屠蒼天變化還須臾坐殿忽作杜鵑去
行河豈意黃能趨人蟲得喪無了日客行感此淚橫臆
有弟落南今在亡十年一字無消息冥鴻一來聽祝辭
世間踏地今危機菰蒲飽霜湖水滿見草為人汝當遠

送楊帥赴詔

謂公目光射牛背公視赤子未脫綳謂公足跡躡龍尾
公守凍壁如癡蠅看公進退無一可公欲自判何方憑
邇來詔書下峻層趣公入趁花底根腰龜杖節亦已了
持橐上雍須公能公言臣是江西獐坐中十言九帶振
滿朝貴人面雪色可忍一一為臣頽吉州城南水如澠
有羹可絲魴可罾書生說食涎已滿寄謝龍闕雙觚稜
祝融海王神最靈胡能呵霧遮前程堂堂大舸截江去

天吳擊鼓馮夷迎孰居其間為此爭東西欲奪公無情
衆生焦灼大火聚公但抱寶眠清冷

再用韻酬陳祕校來詩有擊楫清中原之志故
中間多及之

海中老蜃嘘樓閣局促鷄鵠魯東泊忍能杯視九雲夢
戢戢魚頭沸相嚼濤江亭東識君面再見白也大鵬作
雄辭已褫壯士氣窮髮天驕堪面縛我家荆楚起孤劍
奮身多自青油幕南遷閩嶠已三世土風正坐儒冠錯

尚當拂磨十丈崖刻頌欲將文字託今君精悍喜談兵
指畫魚麗分鵲鶴會當平敵走行在金印皇皇看手攬
不應從我學詩句格律牽纏紛纏索世間冷暖逐處所
火井自溫冰井涸論詩說劍亦奇事媿乏三盃澆索寞
誓將併敵起三關不作羣狐猜鎮惡齊紈魯縞我山東
指日戎車會于樂

永嘉魏祕校訪僕蕭寺且言出處甚詳屬與余
同客崑山使人不能無懷魏云欲還故鄉而吳

中兒女森森如立竹矣因用所惠詩韻聊綴數語以塞來意韻長不復彙括資客中一喙可也

陳侯一榻懸千古賤子何能望入府門前誰者高樞具甚口美髯方快靚裙衣新失大雲寺告訴天吳煩折補陰風立我鐵戶限起倒不供人笑侮邇來稍挫牙角勇一見何知肺肝吐繪衣君欲試華蟲驚領吾方愧桑扈新篇直欲命騷僕寸舌寧當下齊虜已從雁蕩歌貫休更向烏江憐項羽遙知筆下卷波瀾乞與胸中洗塵土

魏侯魏侯聽我語醉裏江山送賓主吳歌一聲落青蒲
遮莫催歸啼杜宇江南江北知何許萬水千山話僧廬
因君永嘉說謝客南海維摩堪淚雨樽前卜試鸚鵡舞
一闕從渠較鄒魯

送別張長官東歸

勸君少留持一觴三年一日纔初長春風悵悵著桃李
露雨沃沃開麻桑道傍簫鼓莫淒咽使君平生面如鐵
裁量渠是臺閣具坐使霜蹄困羈紲前生瘡痂生潢池

手披腹摩隨所醫州家徵財使家督灌輸輦送無愆期
諸郎自是豐年玉誰能待荒學儲穀虛名作崇謹勿近
介者得嫌同者俗懼庵先生室無鄰晚年得君情更親
常時問政有寬猛獨覺處世無緇磷何人幕府容疎懶
憶君高樓衣帶緩竭來問訊池上魚一笑相看喜無筭
了知喜極還生愁獨自含情上小舟府中參佐足追送
坐念長江天際流還家且種鹽官棗垂柳當門樂華皓
詔書定起尹翁塗珍重身名莫草草

上丁郎中

原注
靖

君家去天纔三百君身去天無尺五
忽憶泥功棧外山
盡是杜老思君路而今西子媚迴塘
坐令猛士紆柔腸
可能直下窺秦隴翻作吳兒時世粧

仲章薛公十一鶴季章李白詩百篇
自我過都得二老
頗覺閩蜀堪同川今來劃逢丁將軍
秀傑萬里來嶓岷
篋中當自有行記幸借天壁開嶙峋

送舅氏行

迎面賓鴻去未多攬袂官柳不勝拖還家定笑處彥曲
上水初聽欸乃歌濁酒過隣通問訊青燈語夜愜平和
機雲也有謀東日可解滄浪理釣蓑

寄福清翅山舅陳夢實

路岐引人不作長野梅官柳禪風光看山看水入詩眼
歲月不覺鬚眉蒼請從丈人開肺腸身非石人忘故鄉
五年江湖枕書睡夢隨南去落翁堂亦知行坐歌白頭
池南隱几浴鳬雙鰓孤肯復有羈旅石塘破寺魂悲涼

毛錐不補萬事裂存者各在天一方善和里地知幾易
遼東城郭空相望平生何用酷似舅政似嫗母顰施牆
兒時拊頭祝文章祇今未入崔蔡行三年一書願見貫
骨肉滿縣悲難當屋頭茶蘼定過牆滿窻日色文章香
眼前欠甥頗念否我亦口挂蟾山旁煩將歸意作泉下
小待錦衣漫浴妝

北窻雅言寄朱仁叔

風日暖天大裘蠅飛打窻油北窻墳策高於丘我欲發

視勞牽抽把酒起望天門陬斜鴻書破半張紙枯荷網
空散鉛水機中挑出錦文詩淚滿鴛鴦半身紫新愁波
不窮後愁更隨風美人如嬌春何物可御冬古人已恨
愁不足却遣今人送愁續輕將玉斧贈吳剛漏得寒光
照孤宿素女為天揀退絲伶倫猛截孤生枝沙蟲含冤
射千載誰勸黃竹栽瑤池歌夜長歌夜短淮南桂枝香
滿滿為君持酒壽金人少待露盤辭玉椀

飄風荆溪

船頭月渾雲不度轉眼光陰遽如許江湖無地寄風威
短蓑遺作胡旋舞還將老病入孤舟碧波為人生白頭
闌中五更鵝鴨亂老漁畫肚起長筭

贈英德風和尚

風師風狂無是處文采成龍或成虎向來打槓釘虛空
今日入山還削鐻晴窻洗出烟巖秋休嗟李廣不封侯
見說行年今在坎老慵且作囚山囚

月華道中

善財平明白下床供君一鉢曹溪香山中老盧致無恙
為我一洗醒而狂問君江行何所見邂逅今朝識山面
羣峰亦自不相知窪者欲逃危欲獻窪逃危獻知奈何
小草遠志元同科時來隨喜出雲雨不來抱藹休巖阿
老人於山消底物畢願託身仍託骨接頤孤撐看未已
萬馬崩騰過倏忽貴人祇聽宮門鐸何曾一葉吼冰灘
轉頭便下貞陽峽猿舉臂招人還歸來海上亦不惡
把酒持螯誇至樂明朝遠碧望林巒依舊朱欄照城郭

再賦薄薄酒

薄薄酒全吾天醜醜婦引吾年敗繒簷布形骸便辛勤
著書塞屋椽何如郭外二頃桑麻田折腰斂板高鳬肩
何如方床八尺供橫眠左為劍鉞右鼎耳勸君却步行
相先斗量明珠埒編錢郿塢未就臍已燃十眉間坐爭
連蛸絕纓滅燭薰腥膻農家醜婦眉半櫛白頭惟有夫
壻憐勸君酒薄君勿嗔尚方賜尊能殺人力微覆餗有
明誠食鮭三九元非貧酒不薄人自薄妻不惡人自惡

不如濁酒三盃呼醜婦共作原頭賽神舞

續薄薄酒

薄薄酒勝齋蔬簞簞布勝無襦醜妻惡妾勝鰥孤叱塗
呵道驅高車何如醉歸連臂行相扶巍冠束帶商唐虞
何如北窻散髮擁腹千爬梳金樽瓦盆酒如一食芹差
可無彫胡名堯字孔相號呼百年螻蟻同丘墟朝為卿
相暮匹夫青黃蚤失溝中枯錐利未必賢推愚左圖右
方徒區區不如濁酒三盃對醜婦荆釵布裙相媚嫵

次醉中歌

犢車油壁塵紛紛恨君不識如花人
金鞭爭道誰家郎出門三日香人沐
春風酒面吹微鱗主人拔釵留上賓
洞房燭花盡意明為君拂絃駐歡情
陣鴻塵澀聲難安城烏夜啼訴春寒
吳歛未終初日上璇題藻井知無恙
請君銜盃莫問天茂陵劉郎初學僊
人生百歲俱可憐願君流歡及盛年
世間萬事不如酒九環寶帶時人有
感君一曲寬百憂當時見人面色羞
君不見牆東儒生

食井李一生飲牛廡讓水

醉歌

得誰釀法乃爾佳連引數盃極口誇須臾忘物亦忘我
是非榮辱不可加兒童相隨拍掌笑阿翁醉也扶歸家
平生故人趙半刺遣騎折送園中花飲酒不待勸夜如
何其月欲斜倒著接羅自起舞笛聲趁拍鼓三過陶陶
兀兀意有得小姬在傍雙髻了驅令磨墨具紙筆滿幅
大草飛龍蛇婦云汝醉當止矣明日酒醒不愧耶

謁衛叅政

頃年投詩衛左史今年謁詩衛相公何方客子辟道路
詩卷長邀石浦風先生官職泥土如萬事盡付阿堵中
天教權嬖表忠節劍首一吹毫毛空祇今事業已如許
願聞當時北歸語面對手畫真自知十年絕口吾甚武
謝安風流過王導芙蓉王公竊其表從來雅志在東山
角巾不為箏歌老古人進寸退一尺江草江花足自適
功名時來不作難雷動風行本無跡百姓相驚當歷耳

三江五湖作瘡痍百年天地亦悠悠長鑱老人淚如水
側傍湖脚澱山藍出見輕鷗已不凡頗聞琳琅塞門內
三筆六詩公所監何能撰杖閱諸子看公著帽淹幾晷
朱衣目前空復愁客有焦桐勞下指去家初無可葺牆
獨抱遺經天一方石浦倘為蒼生起天衢日轂遙相望
短歌贈臨安友人

素絲衝塵化為墨老人雙鬢無由黑俗兒翻手候炎涼
惟有君心比霜雪破窻草亢風雨寒夢遊帝鄉虎當關

枯魚對酒淚濺俎雄劍夜吼銅花乾二十辭家顏色故
春心不語絃解語借君古鏡施鉛華含羞獨泣羅房雨
青天中開多不平少年裘馬多流星千金無處買俠骨
坐念歲月空崢嶸

夜坐

來雁無消息寒蟬久寂寥鬢毛隨日化吾意得詩消樓
影三更淡天星幾夜搖眼中無長物拄頰又明朝

倦夜

河津傳五漏霧雨入千家白日鳴饑鼠深更歇怒蛙境
空愁稍進詩短意能加客路多風雨深憂斗柄斜

贈得一禪師

舊時黃正父今日一浮屠四海誰知己三更忽撚鬚空
山吼獅子暗壁縛於菟何日當吾眼藜牀淡爾臞

燈下嘆

老馬知塗益可羞寒燈冷硯照窮愁著書不望從兒讀
歸舍何當與婦謀赤腳踏鯢真浪許短衣射虎恐長休

何人得似襄陽守乞我荅湖十頃秋

次韓耕道贈別韻

一昨羊城別五僊駕言韶石叩鈞天偏師政擬劇詩壘
淺瀨那知滯酒船但使繫書勤雁足敢思騰上竦鳶肩
區區定取韓康笑賣藥逃名却自然

病中用杜工部江村韻

早歲縱橫論九流中年往往愛清幽細觀夢境皆爭鹿
靜遣機心欲狎鷗池上貪閒臨晉帖燈前抱病看吳鉤

山林鍾鼎從天賦言志俱慚點與求

和開元寺省公韻

振錫浮盃定偶然
繭窠誰見老蠶眠
祇知大膽嘲無本
渠識前身是普賢
師欲贏糧趨建德
我慚觀畫訪開先
莫將幻境誇陽燄
吐盡多生渴死涎

附省公作

莫辭委刺去蹢躅
料得先生已醉眠
打徹愁城休強
酒壓低詩社不言賢
琴中有趣嗤陶令
席下無人誚

孝先想是逢人不肯出來臨法會定流涎

至日記見簡輔漢卿二首

滿窻晴旭散輕埃報答生成只酒盃篇什正須今日用
歲時偏傍俗人來輕舫上藕泥初拭小菴爭魚臭不開
試作橫竿權土炭聊從夜半候陽回

枕上吟哦安意好新詩自覺鬼神扶遙傳舊歲無多子
皆試新衣是早圖天下自須胡伯始江東只在管夷吾
鄉山此際當治麥誤矣為文傲兩都

賀郡守得江陰

檢點詩篇方細讀，忽傳新渥照澄江。
榮公銅虎非渠事，舊憶河豚是此邦。
蕭散蓋公宜置舍，風流謝守想臨窻。
他時我得扁舟去，直過凝香索酒缸。

自笑

抱甕終焉與世迷，斲輪久矣嘆吾衰。
江南未必無佳士，海內何由得二兒。
不共施梁爭折角，却思陶謝與同時。
歌成未免傍人笑，農馬雖專技已卑。

清明日湖上晚步

一百五日苦多雨二十四花能幾風壯心欲與兒女競
春事翻成冠盜空公私蛙合笙歌裏客主山張圖畫中
作意後遊仍獨醉西湖莫忘遠來翁

寄德久舍人時將過吳門

昏花亂眼嘆吾衰寶帶忘腰羨子宜碓下誰明能行者
甕中聊覓永禪師醉鄉欲結無為社劫火難燒見在詩
忽憶扁舟洞庭路霜螯斫雪點橙絲

送王楚材往湖州聽讀

短羽真成入殼游，小儒蹤跡欲誰求。
非關古字誅揚子，自是諸生欠沈猶。
百計千方元薄命，雙溪二水各宜秋。
此行試卜唐夫子，會向芹邊問楚囚。

贈玻瓈僧慧觀長老

千年觀一如三日，客同居祇道清淮近。
烏知濁世疎地窮，初限橘水富巧藏。
魚排闥風烟入，觀心視聽虛飯香。
鴉闥戶茶熟水鳴除，潮載支祁憤天關。
禹貢書磬材微。

古在石絕表兇餘董杏通鄰堵秦瓜過滿車遊方孤雁
去問法翠屏舒何日荆溪道誅蓬對結廬

晚霽湖邊獨步

短短桃身盡著花微風細雨響蘆芽一晴眼底皆新物
蛺蝶成羣聚淺沙

題郁氏子床屏

歌舞教成王謝宅百年華屋幾人居豈無藤葛垂陰地
女轉縲車兒讀書

醉歸

夜深霜月冷侵膚
醉飲歸來得自娛
霧氣水光同浩渺
誤看田野作江湖

次潮陽寧公詩韻三首

原注時欲往天台住方廣院

天外誰飄桂子風
老夫鼻觀已先通
直須斬斷年時話
匹似西來歎不逢

十方無壁慣曾遊
一片孤雲任去留
莫話潮陽舊公案
天台行色滿簷頭

竹枝拗折殊多事參取茶甌未到前為報天台癡五百
撞齋邏粥莫爭先

送行者妙淙往青龍謁陳七官人

三生同聽寺樓鐘緊峭芒鞋任所從莫向華亭覓船子
趙州橋下有青龍

為竹奴解嘲用山谷先生韻

通身有眼更無腸好上臙庵師子床莫作綠衣顛倒想
班姬陳后兩淒涼

送雪川丁世卿宰舒之懷寧

長安亂葉舞征衣獨把新詩送吏師自古才名諳宦拙
邇來官事要兒癡

八公草木迎人處三老風沙上水時直使邊頭行國寶
少年白面且經維

江湖後集卷十九